



# Uhapšeni Dragan Vukajlović i Duško Lazarević

# Elektrounion dobio 3,5 miliona KM, a nije bio na tenderu

Lazarević osumnjičen da je podmitio Vukajlovića, kako bi Ured za žalbe donio odluku da Putevi RS-a isplate novac Elektrounionu

**P**o nalogu Tužilaštva BiH, Državna agencija za istrage i zaštitu (SIPA) jučer je uhapsila člana Ureda za žalbe BiH Dragana Vukajlovića i Duška Lazarevića kao odgovornu osobu u firmi Elektrounion iz Istočnog Sarajeva.

Razlog za hapšenje je istraga u vezi s isplatom 3,5 miliona KM sa računa Javnog preduzeća Putevi RS-a firmi Elektrounion. Ova isplata je izvršena na osnovu žalbe koju je uložila firma Elektrounion na tender za posao održavanja saobraćajnica u RS-u, kojeg je raspisalo preduzeće Putevi RS-a.

## Pravne zavrzlamе

Prema navodima SIPA-e, Vukajlović i Lazarević su osumnjičeni za zloupotrebu službenog položaja ili ovlaštenja, primanje dara ili drugog oblika koristi za trgovinu utjecajem, davanje nagrade ili drugog oblika koristi za trgovinu utjecajem, zloupotreba u postupku javne nabavke, neovlašteno davanje poklona ili darova.

Drugim riječima, Lazarević je osumnjičen da je podmitio Vukajlovića, kako bi osigurao da Ured za žalbe donese odluku kojom je naloženo preduzeću Putevi RS-a da isplati blizu 3,5 miliona KM Elektrounionu po osnovu žalbe na spomenuti tender, čime je nastala šteta u budžetu BiH za ovaj iznos.

Treba napomenuti da je Vukajlović jedan od šest članova Ureda za žalbe BiH koji su izglasali odluku o spornoj isplati, a ostali su Željka Klobučar, kao predsjedavajuća Ureda, te Ostoja Kremenović, Ilma Mehić-Jusufbašić, Nikolina Silak i Vildan Đurović, kao



Hapšenja izvedena zbog sumnje o podmićivanju

FOTO: ILUSTRACIJA

članovi ovog tijela. Nezvanično saznajemo da je istragom ustanovljeno da je Vukajlović bio „Elektrounionov čovjek“ u Uredu, zahvaljujući kojem je donesena odluka o isplati.

Pitali smo i Tužilaštvo BiH zašto je uhapšen samo jedan od šest članova Ureda koji su izglasali spomenutu odluku, ali smo od portparola Borisa Grubešića dobili obavijest da zbog nastavka istrage javnosti ne mogu saopćiti više detalja.

Ipak, ono što je najzanimljivije jeste da su različita vijeća Suda BiH do sada donijeli tri različite odluke u vezi s isplatom ovih sredstava, ali i da se Elektrounion uopće nije prijavio na spomenuti tender.

Sve je počelo 2012. godine, kada je preduzeće Putevi RS-a raspisalo tender, podijeljen na 13 dijelova, takozvanih LOT-ova, za održavanje saobraćajnica u RS-u. Firma Elektrounion je preuzela tendersku dokumentaciju za dva

LOT-a, ali nikad nije predala ponudu. Prema medijskim napisima, čak i ne posjeduje mehanizaciju potrebnu za održavanje saobraćajnica. Bar ih nije imao u vrijeme raspisivanja tendera. Umjesto toga, zatražio je dodatno pojašnjenje u vezi s tenderom, a kako ga nije dobio, tražio je njegovo poništavanje.

## Četvrto vijeće

Tada počinju pravne zavrzlamе, koje još nisu okončane, a u kojima Elektrounion koristi nedosljednosti pravnog sistema BiH.

Naime, Elektrounion od Ureda za žalbe traži poništavanje tendera. Kako taj ured nije donio odluku u zakonom predviđenom roku, preduzeće Putevi RS-a posao vrijedan oko 34 miliona KM dodjeljuje firmi Romanijaputevi. Tek nakon djele posla Ured donosi odluku o obustavi postupka dodjele posla. Na osnovu te odluke

Ureda, Elektrounion koristi zakonsku odredbu koja kaže da se u ovim slučajevima oštećenoj strani, zbog nastalog gubitka, treba isplatiti deset posto vrijednosti ugovora.

Preduzeće Putevi RS-a ulažu žalbu na tu odluku Sudu BiH, koji vraća predmet Uredu za žalbe, a taj ured ponovo donosi istu odluku. Spomenuto javno preduzeće upućuje još jednu žalbu, ali Sud BiH sada donosi presudu kojom je potvrđena odluka o isplati, a preduzeću Putevi RS-a je blokiran račun do izmirenja ove obaveze.

Slijedi nova žalba spomenutog javnog preduzeća, ovaj put Upravnom vijeću Suda BiH, koje poništava odluku o isplati. Cijeli predmet je sada pred četvrtim, Apelacionim vijećem Suda BiH, koje treba da donese konačnu odluku. U međuvremenu će, moguće je, o ovom slučaju raspravljati i jedno od krivičnih vijeća Suda BiH.

A. ŠARENKAPA